

20-bob. Byudjetlararo munosabatlar

132-modda. Byudjetlararo munosabatlar tushunchasi

Byudjetlararo munosabatlar O‘zbekiston Respublikasining respublika byudjeti, Qoraqalpog‘iston Respublikasining respublika byudjeti, viloyatlarning viloyat byudjetlari, Toshkent shahrining shahar byudjeti, tumanlar, shaharlar byudjetlari, shuningdek davlat maqsadli jamg‘armalari byudjetlari o‘rtasidagi ushbu Kodeks bilan tegishli byudjetlarga biriktirilgan xarajatlarni amalga oshirish uchun zarur bo‘lgan tegishli byudjetlarni moliyaviy resurslar bilan ta‘minlashga doir munosabatlardir.

Byudjet jarayonida:

O‘zbekiston Respublikasi respublika byudjetining tumanlar va shaharlar byudjetlari bilan;

davlat maqsadli jamg‘armalari byudjetlarining tumanlar va shaharlar byudjetlari bilan;

Qoraqalpog‘iston Respublikasi respublika byudjetining, viloyatlar viloyat byudjetlarining va Toshkent shahri shahar byudjetining bir-biri bilan, shuningdek boshqa ma‘muriy-hududiy birlikning tumanlari va shaharlari byudjetlari bilan;

tumanlar va shaharlar byudjetlari o‘rtasida o‘zaro munosabatlariga yo‘l qo‘yilmaydi.

Qarang: Mazkur Kodeks 131-moddasining beshinchi va oltinchi qismlari, 133 — 142-moddalari, O‘zbekiston Respublikasi Adliya vazirligi tomonidan 2016 yil 22 dekabrda 2850-son bilan davlat ro‘yxatidan o‘tkazilgan O‘zbekiston Respublikasi moliya vazirining 2016 yil 22 noyabrdagi 88-sonli qarori bilan tasdiqlangan O‘zbekiston Respublikasi byudjet tizimi byudjetlarining g‘azna ijrosi qoidalarining 221-bandi.

133-modda. Byudjetlarning darajalari o'rtasida daromadlar va xarajatlarni o'tkazish

Daromadlarni kompensasiya qilish yoki xarajatlarni qoplash Davlat byudjetini ijro etish jarayonida ushbu Kodeksning 138-moddasida nazarda tutilgan, quyi turuvchi byudjetlarning daromadlarini va (yoki) xarajatlarini kamaytirishga yoxud ko'paytirishga olib keladigan hollarda o'zaro hisob-kitoblar bo'yicha mablag'larni ajratish yoki olib qo'yish orqali majburiy tartibda amalga oshiriladi.

Qarang: Mazkur Kodeksning 131 va 132-moddalari.

134-modda. Byudjetlararo transfertlarning shakllari

Byudjetlararo transfertlar subvensiyalar, o'tkazib beriladigan daromadlar, dotasiyalar, byudjet ssudasi o'zaro hisob-kitoblar bo'yicha mablag'lar va maqsadli ijtimoiy transfertlar shaklida amalga oshiriladi.

(134-moddaning birinchi qismi O'zbekiston Respublikasining 2017 yil 29 dekabrda O'RQ-454-sonli Qonuni tahririda — Qonun hujjatlari ma'lumotlari milliy bazasi, 01.01.2018 y., 03/18/454/0493-son)

Byudjetlararo transfertlarning hajmlari:

joriy moliya yilida turli darajadagi byudjetlar daromadlari va xarajatlari o'zgarishiga sabab bo'luvchi qonun hujjatlari qabul qilinganda;

tegishli barcha soliqlar va boshqa majburiy to'lovlarning to'liq tushishidan hamda byudjetdan ajratiladigan mablag'larning o'zlashtirilishidan kelib chiqqan holda aniqlanadi.

Yuqori turuvchi moliya organi tashabbusi bilan yuqori turuvchi byudjet quyi turuvchi byudjet oldidagi byudjetlararo transfertning bir shakli bo'yicha majburiyatlari quyi turuvchi byudjetning yuqori turuvchi byudjet oldidagi byudjetlararo

transfertning boshqa shakli bo'yicha majburiyatlarini kamaytirish evaziga hisobga olinishi mumkin.

Qarang: Mazkur Kodeks 112-moddasining to'rtinchi qismi, 120-moddasi birinchi qismining uchinchi xatboshisi, 139, 140-moddalari, O'zbekiston Respublikasi Adliya vazirligi tomonidan 22.12.2016 yilda 2850-son bilan ro'yxatdan o'tkazilgan O'zbekiston Respublikasi moliya vazirining 2016 yil 22 noyabrdagi 88-sonli buyrug'i bilan tasdiqlangan O'zbekiston Respublikasi byudjet tizimi byudjetlarining g'azna ijrosi qoidalarinining 12-bobi.

135-modda. Subvensiyalar

Subvensiyalar asosiy makroiqtisodiy ko'rsatkichlar prognozi va Davlat byudjetining asosiy parametrlari tasdiqlanayotganda belgilangan xarajatlarni amalga oshirish uchun ajratiladi.

O'zbekiston Respublikasining respublika byudjetidan Qoraqalpog'iston Respublikasi byudjetiga, viloyatlar va Toshkent shahar mahalliy byudjetlariga beriladigan subvensiyalarning miqdorlari asosiy makroiqtisodiy ko'rsatkichlar prognozi va Davlat byudjetining asosiy parametrlari tasdiqlanayotganda belgilanadi.

Qoraqalpog'iston Respublikasining respublika byudjetidan, viloyatlarning viloyat byudjetlari va Toshkent shahrining shahar byudjetidan tumanlar va shaharlar byudjetlariga beriladigan subvensiyalarning miqdorlari Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan belgilanadi.

Foydalanilmagan subvensiyalar joriy moliya yili oxirida tegishli yuqori turuvchi byudjetga qaytarilishi kerak.

Qarang: Mazkur Kodeksning 134-moddasining birinchi qismi, 137-moddasining birinchi qismi, O'zbekiston Respublikasi Adliya vazirligi tomonidan 11.10.2010 yilda 2146-

son bilan ro'yxatdan o'tkazilgan O'zbekiston Respublikasi moliya vazirining 20.08.2010 yildagi 65-sonli buyrug'i bilan tasdiqlangan Byudjet tasnifini qo'llash bo'yicha yo'riqnomaning 59-bandi.

136-modda. O'tkazib beriladigan daromadlar

Tegishli ma'muriy-hududiy birliklar hududida shakllantiriladigan va yuqori turuvchi byudjetga o'tkaziladigan daromadlar ular qaysi ma'muriy-hududiy birlikda shakllantirilgan bo'lsa, o'sha ma'muriy-hududiy birlik byudjetiga o'tkazib berilishi mumkin.

O'tkazib beriladigan daromadlarning umumiy hajmi:

O'zbekiston Respublikasining respublika byudjetidan quyidagi turuvchi byudjetlarga — asosiy makroiqtisodiy ko'rsatkichlar prognozi va Davlat byudjetining asosiy parametrlari tasdiqlanayotganda;

Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan tumanlar va shaharlar byudjetlariga — Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan tasdiqlanadi.

O'zbekiston Respublikasining respublika byudjetidan quyidagi turuvchi byudjetlarga tushumlari o'tkazib beriladigan xo'jalik yurituvchi sub'yektlarning hamda ular tomonidan to'lanadigan soliqlar va boshqa majburiy to'lovlarning turlari ro'yxati O'zbekiston Respublikasi Moliya vazirligi tomonidan O'zbekiston Respublikasi Davlat soliq qo'mitasi bilan birgalikda tasdiqlanadi.

Qoraqalpog'iston Respublikasi byudjetidan, viloyatlar va Toshkent shahar mahalliy byudjetlaridan tumanlar va shaharlar byudjetlariga tushumlari o'tkazib beriladigan xo'jalik yurituvchi sub'yektlarning hamda ular tomonidan to'lanadigan soliqlar va boshqa majburiy to'lovlarning turlari ro'yxati Qoraqalpog'iston Respublikasi Moliya vazirligi, viloyatlar va Toshkent shahar moliya boshqarmalari tomonidan Qoraqalpog'iston

Respublikasi, viloyatlar va Toshkent shahar davlat soliq boshqarmalari bilan birgalikda tasdiqlanadi.

Yuqori turuvchi byudjetdan quyi turuvchi byudjetga o'tkazib beriladigan daromadlarning summasi tegishli quyi turuvchi byudjetga tushishi lozim bo'lgan daromadlar hisobga olingan holda belgilanadi.

O'tkazib beriladigan daromadlarni o'tkazish ular bo'yicha haqiqatda tushgan tushumlar doirasida, biroq ularning tasdiqlangan hajmidan ortiq bo'lmagan miqdorda amalga oshiriladi.

*Qarang: O'zbekiston Respublikasi Adliya vazirligi tomonidan 12.05.2010 yildagi 2102-son bilan ro'yxatdan o'tkazilgan O'zbekiston Respublikasi moliya vaziri va O'zbekiston Respublikasi Davlat soliq qo'mitasining 12.05.2010 yildagi 27-sonli buyrug'i bilan tasdiqlangan Yuqori byudjetdan quyi byudjetlarga o'tkazib beriladigan daromadlarni rejalashtirish, ajratish tartibi to'g'risida **nizom**.*

137-modda. Dotasiya

Yuqori turuvchi byudjetdan quyi turuvchi byudjetga dotasiya quyi turuvchi byudjet xarajatlarining rejalashtirilgan hajmi subvensiyalar va o'tkazib beriladigan daromadlar hisobga olingan holda mazkur byudjet daromadlarining prognoz qilingan hajmidan oshib ketgan taqdirda ajratiladi.

O'zbekiston Respublikasining respublika byudjetidan davlat maqsadli jamg'armalarining byudjetlariga dotasiya jamg'armalar xarajatlarining rejalashtirilgan hajmi yil boshidagi qoldiq hisobga olingan holda jamg'armalar daromadlarining prognoz qilingan hajmidan oshib ketgan taqdirda ajratilishi mumkin.

Dotasiyaning miqdori:

O'zbekiston Respublikasining respublika byudjetidan quyi turuvchi byudjetlarga va davlat maqsadli jamg'armalari byudjetlariga ajratilganda — asosiy makroiqtisodiy

ko'rsatkichlar prognozi va Davlat byudjetining asosiy parametrlari tasdiqlanayotganda;

Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan tumanlar va shaharlar byudjetlariga ajratilganda — Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan belgilanadi.

Qarang: O'zbekiston Respublikasi Adliya vazirligi tomonidan 12.05.2010 yilda 2102-son bilan ro'yxatdan o'tkazilgan O'zbekiston Respublikasi moliya vaziri va O'zbekiston Respublikasi Davlat soliq qo'mitasining 12.05.2010 yildagi 27-sonli buyrug'i bilan tasdiqlangan Yuqori byudjetdan quyi byudjetlarga o'tkazib beriladigan daromadlarni rejalashtirish, ajratish tartibi to'g'risida nizomning 5-bandi.

138-modda. Byudjetlararo o'zaro hisob-kitoblar

Byudjetlararo o'zaro hisob-kitoblar moliya yili mobaynida byudjetlar parametrlari o'zgarganda yuqori va quyi turuvchi byudjetlar o'rtasida yuzaga keladigan o'zaro pul munosabatlaridir.

Byudjetlararo o'zaro hisob-kitoblar:

qonun hujjatlari qabul qilinganligi;

Qoraqalpog'iston Respublikasi byudjeti, viloyatlar va Toshkent shahar mahalliy byudjetlari daromadlarining prognozi aniqlashtirilganligi;

byudjet tashkilotlari va byudjet mablag'lari oluvchilarning bo'ysunuvi o'zgarganda xarajatlar bir byudjetdan boshqa byudjetga o'tkazilganligi;

kapital qo'yilmalar limitlari byudjetlar darajalari o'rtasida qayta taqsimlanganligi munosabati bilan yuzaga keladi.

Byudjetlararo o'zaro hisob-kitoblarga kiritilishi lozim bo'lgan summa yuqori turuvchi moliya organi tomonidan aniqlanadi.

Qarang: Mazkur Kodeksning 10 va 20-moddalari, 127-moddasining beshinchi qismi, 131-moddasi oltinchi qismi, O‘zbekiston Respublikasi Vazirlar Mahkamasining 2019 yil 25 iyundagi “O‘zaro hisob-kitoblar tizimida elektron shakldagi hisobvara-q-fakturalardan foydalanishni takomillashtirish chora-tadbirlari to‘g‘risida”gi 522-sonli qarori.

138¹-modda. Maqsadli ijtimoiy transfertlar

Maqsadli ijtimoiy transfertlar yuqori turuvchi byudjetdan quyi turuvchi byudjetga ta’lim va tibbiyot muassasalarining ish haqi va yagona ijtimoiy to‘lovlar bo‘yicha xarajatlarini qoplash uchun ajratiladi.

Maqsadli ijtimoiy transfertlarning miqdorlari:

O‘zbekiston Respublikasining respublika byudjetidan Qoraqalpog‘iston Respublikasi byudjetiga, viloyatlar va Toshkent shahar mahalliy byudjetlariga – asosiy makroiqtisodiy ko‘rsatkichlar prognozi va Davlat byudjetining asosiy parametrlari tasdiqlanayotganda;

Qoraqalpog‘iston Respublikasining respublika byudjetidan, viloyatlarning viloyat byudjetlari va Toshkent shahrining shahar byudjetidan tumanlar va shaharlar byudjetlariga — Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari tasdiqlanayotganda Qoraqalpog‘iston Respublikasi Vazirlar Kengashi, viloyatlar va Toshkent shahar hokimlari tomonidan belgilanadi.

Foydalanilmagan maqsadli ijtimoiy transfertlar joriy moliya yili oxirida tegishli yuqori turuvchi byudjetga qaytarilishi kerak.

(138¹-modda O‘zbekiston Respublikasining 2017 yil 29 dekabrda O‘RQ-454-sonli Qonuniga asosan kiritilgan — Qonun hujjatlari ma’lumotlari milliy bazasi, 01.01.2018 y., 03/18/454/0493-son)

Qarang: Mazkur Kodeksning 134, 139, 140-moddalari.

139-modda. Byudjetlararo transfertlarni o'tkazish tartibi

O'zbekiston Respublikasining respublika byudjetidan byudjetlararo transfertlar O'zbekiston Respublikasi respublika byudjetining shaxsiy g'azna hisobvarag'idan Qoraqalpog'iston Respublikasi respublika byudjetining, viloyatlar viloyat byudjetlarining va Toshkent shahri shahar byudjetining, shuningdek davlat maqsadli jamg'armalari byudjetlarining shaxsiy g'azna hisobvaraqlariga o'tkaziladi.

Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan byudjetlararo transfertlar ularning shaxsiy g'azna hisobvaraqlaridan tumanlar, shaharlar byudjetlarining shaxsiy g'azna hisobvaraqlariga, shuningdek davlat maqsadli jamg'armalari byudjetlarining shaxsiy g'azna hisobvaraqlariga o'tkaziladi.

Davlat maqsadli jamg'armalari byudjetlaridan byudjetlararo transfertlar ularning shaxsiy g'azna hisobvaraqlaridan O'zbekiston Respublikasi respublika byudjetining, Qoraqalpog'iston Respublikasi respublika byudjetining, viloyatlar viloyat byudjetlarining va Toshkent shahri shahar byudjetining shaxsiy g'azna hisobvaraqlariga o'tkaziladi.

Byudjetlararo transfertlarni o'tkazish g'azna memorial orderlari asosida amalga oshiriladi.

Byudjetlararo transfertlar bo'yicha hisob-kitoblar joriy moliya yilida qo'shimcha vaqt davri hisobga olingan holda tugallanishi kerak.

Qarang: Mazkur Kodeksning 134, 140-moddalari, O'zbekiston Respublikasi Adliya vazirligi tomonidan 22.12.2016 yilda 2850-son bilan ro'yxatdan o'tkazilgan O'zbekiston Respublikasi moliya vazirining 2016 yil 22 noyabrdagi 88-son buyrug'i bilan tasdiqlangan O'zbekiston Respublikasi byudjet tizimi byudjetlarining g'azna ijrosi qoidalarining 12-bobi.

140-modda. Byudjet ssudasi shaklidagi byudjetlararo transfert

Byudjet ssudasi shaklidagi byudjetlararo transfert (byudjet ssudasi) byudjet manbalarining to'liq safarbar qilinishi tegishli byudjetlarda nazarda tutilgan xarajatlar qoplanishini ta'minlamagan taqdirda, qaytarish sharti bilan va foizsiz beriladi.

Byudjet ssudasi:

prognoz qilingan daromadlar va rejalashtirilgan xarajatlar o'rtasidagi rejali vaqtinchalik kassa uzilishini qoplash uchun — to'qqiz oygacha bo'lgan muddatga;

daromadlar tushumlari va xarajatlarni amalga oshirish o'rtasida kutilayotgan vaqtinchalik kassa uzilishlarini qoplash uchun — olti oygacha bo'lgan muddatga beriladi.

Rejali byudjet ssudasi daromadlarning prognoz qilingan tushumlari, nazarda tutilgan subvensiya, o'tkazib beriladigan daromadlarning summasi maqsadli ijtimoiy transfertlar, aylanma kassa mablag'laridan va yil boshidagi erkin qoldiqlardan vaqtinchalik mablag' jalb qilish, dotasiya tasdiqlangan tegishli byudjetlarda nazarda tutilgan ayrim choraklardagi xarajatlar qoplanishini ta'minlamagan hollarda beriladi.

(140-moddaning uchinchi qismi O'zbekiston Respublikasining 2017 yil 29 dekabrda O'RQ-454-sonli Qonuni tahririda — Qonun hujjatlari ma'lumotlari milliy bazasi, 01.01.2018 y., 03/18/454/0493-son)

Byudjet ssudasi:

O'zbekiston Respublikasining respublika byudjeti mablag'lari hisobidan — Qoraqalpog'iston Respublikasining respublika byudjetiga, viloyatlarning viloyat byudjetlariga, Toshkent shahrining shahar byudjetiga, davlat maqsadli jamg'armalari byudjetlariga;

Qoraqalpog'iston Respublikasining respublika byudjeti, viloyatlarning viloyat byudjetlari, Toshkent shahrining shahar byudjeti mablag'lari hisobidan — tumanlar va shaharlar byudjetlariga ularning daromadlari hamda xarajatlari o'rtasidagi

rejali yoki kutilayotgan vaqtinchalik kassa uzilishini qoplash uchun beriladi.

Byudjet ssudalarini berishning majburiy sharti ulardan belgilangan maqsadda foydalanish, shuningdek joriy moliya yili mobaynida ularni o'z vaqtida qoplashdan iboratdir.

Byudjet ssudasi Qoraqalpog'iston Respublikasi Vazirlar Kengashi va tegishli hokimliklarning, davlat maqsadli jamg'armasini taqsimlovchi organ rahbarining byudjet ssudasiga bo'lgan ehtiyojni asoslovchi hisob-kitoblar ilova qilingan yozma so'rovi asosida beriladi. Byudjet ssudasi berish to'g'risidagi yozma so'rovni ko'rib chiqishda moliya organi qaror qabul qilish uchun zarur bo'lgan axborot va hisob-kitoblarni so'rab olish huquqiga ega.

Qoraqalpog'iston Respublikasi Vazirlar Kengashi va tegishli hokimliklarning, davlat maqsadli jamg'armasini taqsimlovchi organ rahbarining yozma so'rovini ko'rib chiqish yakunlari bo'yicha byudjet ssudasini berish to'g'risidagi qaror:

O'zbekiston Respublikasi respublika byudjetidan —
O'zbekiston Respublikasi moliya vaziri tomonidan;

Qoraqalpog'iston Respublikasining respublika byudjeti, viloyatlarning viloyat byudjetlari, Toshkent shahrining shahar byudjetidan — tegishincha Qoraqalpog'iston Respublikasi moliya vaziri, viloyatlar va Toshkent shahar moliya boshqarmalari boshliqlari tomonidan besh ish kuni ichida qabul qilinadi.

Byudjet ssudasini ajratish byudjet ssudasini berayotgan moliya organi va byudjet ssudasini oluvchi moliya organi (davlat maqsadli jamg'armalarini taqsimlovchi organ) o'rtasida byudjet ssudasi berish to'g'risidagi shartnoma bilan rasmiylashtiriladi.

Byudjet ssudasini qaytarish muddatlarini uzaytirish byudjet ssudasini oluvchida uni belgilangan muddatlarda o'z vaqtida to'lash imkoniyatini istisno etadigan moliyaviy qiyinchiliklar yuzaga kelgan hollarda amalga oshiriladi.

Byudjet ssudasini qaytarish muddatlarini uzaytirish byudjet ssudasini berish uchun ushbu moddada belgilangan tartibda va shartlar asosida amalga oshiriladi.

Byudjet ssudasini oluvchi tegishli moliya organiga byudjet ssudasini to'lash muddatlarini uzaytirish to'g'risidagi yozma so'rov bilan to'lash muddati tugashidan kamida besh ish kuni oldin murojaat etadi.

Byudjet ssudasini to'lash byudjet ssudasini berish to'g'risidagi shartnomada belgilangan muddatlarda:

mablag'larni o'tkazish;

quyi turuvchi byudjetlarga va davlat maqsadli jamg'armalariga o'tkazilishi kerak bo'lgan subvensiyalar, o'tkazib beriladigan daromadlar, byudjetlararo o'zaro hisob-kitoblar va dotasiyalar evaziga o'zaro hisobga olish;

ish haqini to'lash, ijtimoiy ehtiyojlarga ajratmalar, stipendiyalar, pensiyalar, kam ta'minlangan oilalarga moddiy yordam, kompensasiya to'lovlari va nafaqalar to'lash xarajatlari qoplanganidan so'ng quyi turuvchi byudjetlarning va davlat maqsadli jamg'armalari byudjetlarining shaxsiy g'azna hisobvaraqlaridan mablag'larni so'zsiz undirib olish yo'li bilan amalga oshiriladi.

141-modda. Aylanma kassa mablag'lari

O'zbekiston Respublikasi respublika byudjetining, Qoraqalpog'iston Respublikasi respublika byudjetining, viloyatlar viloyat byudjetlarining, Toshkent shahri shahar byudjetining, shuningdek tumanlar, shaharlar byudjetlarining aylanma kassa mablag'lari ularning daromadlari bilan xarajatlari o'rtasidagi vaqtinchalik kassa uzilishini qoplash maqsadida shakllantiriladi.

Aylanma kassa mablag'larining miqdorlari:

O'zbekiston Respublikasining respublika byudjeti, Qoraqalpog'iston Respublikasi byudjeti, viloyatlar va Toshkent shahar mahalliy byudjetlari uchun — asosiy makroiqtisodiy

ko'rsatkichlar prognozi va Davlat byudjetining asosiy parametrlari tasdiqlanayotganda;

tumanlar va shaharlar byudjetlari uchun — Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan belgilanadi.

Yil mobaynida aylanma kassa mablag'laridan jalb qilingan summalar yil oxirigacha tiklanishi lozim. Aylanma kassa mablag'larining yil oxiridagi miqdori belgilangan summaga mos kelishi kerak.

Kelgusi moliya yili uchun belgilangan aylanma kassa mablag'lari:

tegishli byudjetlarning shaxsiy g'azna hisobvaraqlaridagi mablag'larning yil boshidagi qoldiqlari;

joriy yilning birinchi — uchinchi choraklari yakunlari bo'yicha daromadlar prognozining oshirib bajarilishi summalari hisobidan to'ldiriladi.

Tumanlar va shaharlar byudjetlarining ushbu moddaning to'rtinchi qismida ko'rsatilgan manbalari yetarli bo'lmaganda tumanlar va shaharlar byudjetlarining aylanma kassa mablag'larini to'ldirish to'g'risida Qoraqalpog'iston Respublikasi Vazirlar Kengashi, viloyatlar va Toshkent shahar hokimlari tomonidan qaror qabul qilinishi mumkin.

Qarang: Mazkur Kodeks 3-moddasining ikkinchi xatboshisi, 99-moddasi, O'zbekiston Respublikasi Prezidentining 2017 yil 7 iyundagi "Mahalliy davlat hokimiyati organlarining byudjet vakolatlarini kengaytirish va mahalliy byudjet daromadlarini shakllantirishdagi mas'uliyatini oshirish to'g'risida"gi PQ-3042-son qarori 2-bandining ikkinchi xatboshisi, 3-bandining to'rtinchi xatboshisi, 6-bandining to'rtinchi xatboshisi.

142-modda. Qoraqalpog‘iston Respublikasi byudjetiga, viloyatlar va Toshkent shahar mahalliy byudjetlariga qo‘llaniladigan cheklovlar

Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari balanslashtirilgan daromadlar va xarajatlarga ega bo‘lishi lozim. Qoraqalpog‘iston Respublikasi byudjeti, viloyatlar va Toshkent shahar mahalliy byudjetlari taqchilligiga yo‘l qo‘yilmaydi.

Qoraqalpog‘iston Respublikasi byudjeti, viloyatlar va Toshkent shahar mahalliy byudjetlarini qabul qilish va ijro etishda:

mablag‘lar jalb qilishni amalga oshirishga, yuqori turuvchi byudjetlardan byudjet ssudalari olish bundan mustasno;

tasdiqlangan byudjetdan ajratilgan mablag‘lardan ortiq xarajatlarni amalga oshirishga, ushbu Kodeksning 143-moddasi **ikkinchi qismida** nazarda tutilgan hollar bundan mustasno;

tegishli byudjetlar mablag‘lari hisobidan boshqa yuridik va jismoniy shaxslar foydasiga moliyaviy kafolatlar va kafilliklar berishga;

yuridik va jismoniy shaxslarga byudjet ssudalari va kredit liniyalari berishga yo‘l qo‘yilmaydi.

Qarang: Mazkur Kodeksning 27, 28, 35, 71-moddalari.